

आकाशवाणी जयपुर-अजमेर  
प्रादेशिक समाचार

दिनांक 11.07.2025

समय: 18.45 बजे

- प्रधानमंत्री नरेन्द्र मोदी काले वीडियो कॉन्फ्रेंसिंग रे जरिये 51 हजार सू बत्ती युवावां ने नियुक्ति पाना देवेला-जयपुर, अजमेर, बीकानेर अर जोधपुर मांय भी रूजगार मेळा लागेला।
- केन्द्रीय मंत्री जयंत चौधरी बतायो के स्कूली पढ़ेसरियां रे कौशल विकास खातिर बेगो ही ए.आई माथे फ्री ऑनलाइन कोर्स सरू कर्यो जावेला।
- चिकित्सा मंत्री गजेन्द्र सिंह खींवर साफ कह्यो-आर.जी.एच.एस. ने बंद नी कर्यो जावेला।
- मौसम महकमो राज्य रा पूर्वी हलकां मांय आवता दो सप्ताह-वठिने पश्चिमी भागां मांय एक सप्ताह औसत सू बत्ती बिरखा री आस जताई।

प्रधानमंत्री नरेन्द्र मोदी काले वीडियो कॉन्फ्रेंसिंग रे जरिये 51 हजार सू बत्ता मोट्यारां ने नियुक्ति पत्र बांटेला। 16 वां रूजगार मेळा मांय सुवांरे 11 बजे सू न्यारा-न्यारा मंत्रालयां अर महकमां और संगठनां रा नुवां नियुक्त मोट्यारां ने ए नियुक्ति पाना सौप्यां जावेलां। इण मौके माथे प्रधानमंत्री वां ने सम्बोधित भी करेला। देशभर री 47 जगवां माथे रूजगार मेळे रो आयोजन कर्यो जा रह्यो है। रूजगार मेळो सरकार री रूजगार सृजित करणे री प्रतिबद्धता री दिशा मांय खास पहल है। देशभर मांय व्ह्या रोजगार मेळा रे माध्यम सू अबे ताई 10 लाख सू बत्ती नियुक्ति पाना जारी कर्या जा चुक्या है। प्रदेश मांय ऐ रोजगार मेळा अजमेर, बीकानेर, जयपुर अर जोधपुर मांय राख्या जा रह्या है। जिण रे तैत रेलवे रा 585 समेत दूजा महकमां रा कुल 742 अभ्यर्थियां ने नियुक्ति पानो सौप्यो जावेला। इण मांय डाक विभाग, स्वास्थ्य, उच्च शिक्षा, वित्त अर पुलिस महकमो भेळो है। केन्द्रीय मंत्री भूपेन्द्र यादव काले जयपुर मांय होवण वाळे रूजगार मेळा मांय नियुक्ति पानो देवेला। उत्तर-पश्चिम रेलवे रा मुख्य जनसम्पर्क अहलकार शशि किरण बतायो कि मेळे रो आयोजन कॉन्स्टीट्यूशन क्लब मांय कर्यो जावेला।

केन्द्रीय कौशल विकास अर उद्यमिता मंत्री जयंत चौधरी कह्यो है कि **आर्टिफिशियल इन्टेलीजेंस** आज रे बकत री जरूरत है अर हर खेतर मांय इण रो उपयोग होणो चाहिजे। श्री चौधरी आज जयपुर मांय खबरनवीसां सू बणतल कर रह्या हा। वणा बतायो कि मंत्रालय इणी म्हीने स्कूली पढ़ेसरियां खातिर ए.आई रो फ्री ऑनलाइन कोर्स सरू करने जा रिया है।

केन्द्रीय मंत्री अर राष्ट्रीय लोक दल रा अध्यक्ष श्री चौधरी जयपुर मांय कार्यकर्तावां रे सम्मेलन ने भी सम्बोधित कर्यो। वणा कह्यो की राजस्थान मांय संगठन रे विस्तार री तियारी करी जा री है। राज्यपाल हरिभाऊ बागडे राज्य रा काश्तकारां खातिर बांस उत्पादन री संभावनावां माथे प्रभावी कार्य योजना बणावण रा हुकम दिया है। श्री बागडे आज **राजभवन में ग्रामीण आजीविका सृजन में बांस की भूमिका** विषय माथे राखीजी बैठक मांय बोल रह्या हा। श्री बागडे अहलकारां सू कह्यो की राज्य मांय कम पाणी वाळा खेतरां मांय बांस री खेती ने बधावो देवण माथे खास जोर दियो जावेला। वणा कह्यो की इण सू पर्यावरण संरक्षण रे साथै काश्तकारां ने आर्थिक लाभ भी व्हेला।

राज्यपाल इण रे खातिर काश्तकारां ने प्रशिक्षित करणे री आवश्यकता जताई।

**एक राष्ट्र, एक चुनाव** माथे गठित संयुक्त संसदीय समिति री आज बैठक व्ही। 39 सदस्यां वाळी इण समिति मांय 27 सदस्य लोकसभा अर 12 सदस्य राज्यसभा रा है। समिति रा अध्यक्ष अर भाजपा सांसद पी.पी. चौधरी बतायो कि समिति रिपोर्ट ने ले र कानून विशेषज्ञां रे साथै सलाह-मशवरो कर री है।

उपराष्ट्रपति जगदीप धनखड़ रो काले कोटा दौरे रो कार्यक्रम है। श्री धनखड़ आईआईटी कोटा रे चौथे दीक्षांत जळसा मांय शिरकत करेला। जळसा रा समन्वयक प्रोफेसर के.के. शर्मा बतायो के कार्यक्रम मांय पढेसरिया ने बीटेक अर चार ने एमटेक री उपाधियां दी जावेला।

विश्व जनसंख्या दिवस माथे केन्द्रीय स्वास्थ्य मंत्री जे.पी. नड्डा जनसंख्या नियंत्रण माथे जोर दिया है। सोशल मीडिया पोस्ट माथे श्री नड्डा लिख्यो कि मातृ अर शिशु स्वास्थ्य मांय चौखा तनीजा खातिर माता-पिता ने टाबरां रे पालन-पोषण री सही योजना तैयार करणी चाहिजे। स्वास्थ्य मंत्री कह्यो के आयुष्मान आरोग्य मंदिरां समेत सार्वजनिक स्वास्थ्य सुविधावां रे माध्यम सूं, केंद्र सरकार पूरे देश मांय जरूरी परिवार नियोजन सेवावां दे रही है। विश्व जनसंख्या दिवस रो राज्य स्तरीय जळसो जयपुर मांय राख्यो गयो। चिकित्सा मंत्री गजेन्द्र सिंह खींवर भी इण मांय शिरकत करी। इण रे चालता परिवार कल्याण रे खेतर मांय चौखी सेवावां देवण वाळां कार्मिक अर संस्थावां ने सम्मानित कर्यो गयो। पत्रकारां सूं बातचीत मांय श्री खींवर साफ कह्यो की आर.जी.एच.एस. ने बंद नी कर्यो जावेला बल्कि न्यारा-न्यारा बिन्दुआं माथे चर्चा रे पाछे सरकार ई ने नुवा पारदर्शी तरीके सूं लागू करेली।

**मुख्यमंत्री आयुष्मान आरोग्य योजना** सूं प्रदेश मांय अबे ताई 43 लाख सूं बत्ती रोगियां ने पांच हजार करोड़ रिप्यां सूं बत्ती रो निःशुल्क उपचार मिल्यो है।

चिकित्सा अर स्वास्थ्य महकमां री कानी सूं चलाई जा री इण योजना मांय सामान्य बीमारी सूं ले र रोबोटिक सर्जरी रे माध्यम सूं ईलाज कर्यो जा रह्यो है। इण मांय एल्योपैथी सूं ले र आयुष पद्धति रा उपचार पैकेज भेळा है। मुख्यमंत्री भजन लाल शर्मा री पहल माथे इण योजना रो दायरो बधाता व्ह्या गंभीर बीमारियां रे रोगियां रे खातिर दिव्यागां खातिर, बुजुर्गों खातिर अर किशोरां रे मनोवैज्ञानिक स्वास्थ्य खातिर नुवा पैकेज जोड़्या गया है। इण प्रकार प्रदेश मांय स्वास्थ्य सेवावां री पहुँच सुगम बणायी ज्यी है।

लोकसभा अध्यक्ष ओम बिरला आप रे संसदीय खेतर कोटा-बूंदी रे प्रवास माथे है। वणा आज बूंदी रे खेल संकुल परिसर मांय पौधा लगाया। **एक पेड़ मां के नाम अभियान** रे तैत व्ह्या इण वन महोत्सव मांय केई सामाजिक संस्थावां, संगठनां अर पढेसरी भी भागीदारी निभाई। इण मौके माथे श्री बिरला कह्यो के ओ अभियान पर्यावरण रे खातिर आपणी जिम्मेदारी रो प्रतिक है। इण रे साथै ही आवण वाळी पीढियां ने भी सुरक्षित भविष्य प्रदान करेला। इण मौके माथे श्री बिरला जल संरक्षण सूं जुड़्या कामां रो भी लोकार्पण कर्या।

उपमुख्यमंत्री अर पर्यटन मंत्री दिया कुमारी पर्यटन रे सामुदायिक जिम्मेदारी आधारित मॉडल माथे जोर दियो है। पर्यटन मंत्री आज जयपुर मांय **इण्डियन रेस्पॉन्सिबल ट्यूरिज्म स्टेट अवार्ड** जळसा मांय बोल री ही। वणा कह्यो के प्रदेश री विरासत रो सम्मान करता व्ह्या समुदाय, संस्कृति रा प्रति आप ने आपणी जिम्मेदारी समझणी चाहिजे। वणा कह्यो के राजस्थान मात्र पर्यटन स्थल नी है बल्कि जीवंत संस्कृति रो स्वरूप है अर आपा ने इणो सम्मान करणो चाहिजे।

जयपुर रा जवाहर कला केन्द्र मांय आज सूं **नटराज महोत्सव** री सुरुआत हो री है। 17 जुलाई ताई होवण वाळां इण फेस्टीवल मांय निर्देशक योगेन्द्र सिंह परमार रा क्यूरेसन मांय 6 नाटकां रा मंचन व्हेला। जे.के.के री अतिरिक्त महानिदेशक अल्का मीणा बतायो के महोत्सव रो शुभारम्भ संगीतमय नाट्य प्रस्तुति **“और करो थिएटर”** रे साथै व्हेला।

सावन रो म्हीनो आज सूं शुरू व्हे गयो है। इण पवित्र म्हीने रे पैले दिन आज शिवालयां मांय सुवारे सूं ही शिव भक्तां रो तातो लाग्योड़ो है। घणी तादाद मांय सिरधालू दर्शन अर जलाभिषेक खातिर पहुँच रह्या है। बेल पत्र चढ़ा र मिन्दरां मांय खास पूजा अर्चना करी जा री है अर **हर हर** महादेव रा जयकारां सूं माहौल भक्तिमय हो गयो है। श्रावण मास री सुरुआत रे साथै ही कांवड़ यात्रावां भी आज सूं सुरु व्हे गयी है।

मौसम महकमो पूर्वी राजस्थान रा घणखर हिस्सां मांय आगले दो सप्ताह ताई वठिने पश्चिमी राजस्थान री घणखर ठौड़ां मांय आगले एक सप्ताह बरसात रो दौर जारी रहणे रे साथै ही औसत सूं बत्ती बरसात री आस जतायी है। आज अजमेर मांय सुवारे सूं ही काली घटावां छा गी दोपहरा मांय घणी जोर की बिरखा व्ही। राजसमंद अलवर अर पाली मांय थोड़ी देर बरसात व्ही। वठिने जैसलमेर मांय बादळा री आवाजावी बणी री, लारला एक सप्ताह सूं लोग अठे बिरखा रो बेसबरी से इंतजार कर रिया है। इण बीच प्रदेश मांय बित्यां

चौबीस घंटां मांय कटेई-कटेई हल्की अर कटेई-कटेई भारी बिरखा दरज करीजी। सब सूं बत्ती 10 सेंटीमीटर बरसात जयपुर रा चाकसू मांय व्ही। वठिने धौलपुर रा बाड़ी-बसेड़ी मांय जम र पाणी बरस्यो। झुन्झुनू, दौसा, सवाईमाधोपुर, भरतपुर, टोंक, अलवर, चूरू, नागौर सूं भी चौखी बिरखा रा समचार है।

पाली मांय आज सुवांरे एक सड़क हादसा मांय दो जणा री मौत व्हेगी। हादसो गुढा-ऐन्दला रोड़ माथे एक बेकाबू कार रे मोटरसाईकिल माथे टक्कर मारणे सूं व्ह्यो। इण सूं एक दम्पति मौके माथे ही दम तोड दियो।

हनुमानगढ़ जिले रो थापना दिवस काले है। इण मौके मांय आज सूं न्यारा-न्यारा कार्यक्रमों री सरूआत करीजी। इण रे चालता स्कूलां मांय न्यारी-न्यारी होड़ा व्ही। वठिने दफ़तरां मांय पौधा रोपण कार्यक्रम भी राख्या गया। थापना दिवस रे मौके माथे काले **रन फॉर हनुमानगढ़** राख्यी जावेली। इण रे अलावा रक्तदान शिविर, प्रदर्शनी, शैक्षणिक भ्रमण अर सांस्कृतिक कार्यक्रम भी राख्या जावेला।

भारतीय रिज़र्व बैंक रा गवर्नर संजय मल्होत्रा साफ़ कह्यो है के 2 हजार रिप्यां रा नोट प्रचलन मांय नही है पण अ कानूनी रूप सूं वैध है। वणा आ बात वित्त सूं संबद्ध संसदीय स्थायी समिति ने भारत री आर्थिक वृद्धि रा बारा मांय जाणकारी देवता थकां कही। संसद रा केई सदस्य संसदीय समिति री बैठक रे चालतां 2 हजार रिप्यां रा नोट री स्थिति रा बारा मां सवाल कर्यो हो। आरबीआई अजै ताई आं नोटां ने अवैध घोषित नही कर्यो है।

महिला अर बाल विकास मंत्रालय री क्षेत्रीय बैठक काले व्हेला। गुजरात रा केवडिया मांय होवण वाळी इण बैठक मांय सब सूं चौखी कार्यप्रणालियां नवीन मॉडलां अर आपसी सहयोग माथे चर्चा करी जावेली।